

Na osnovu člana 16. stav 2. Zakona o Vladi Zeničko-dobojskog kantona - Prečišćeni tekst („Službene novine Zeničko-dobojskog kantona“, broj 7/10,3/23), a u vezi sa članom 9. Zakona o upravljanju otpadom („Službene novine FBiH” broj: 33/03, 72/09, 92/17 i 72/24) i članom 2. tačka h) Zakona o povjeravanju javnih ovlaštenja iz oblasti zaštite okoliša („Službene novine Zeničko-dobojskog kantona” broj 12/13), na prijedlog Ministarstva za prostorno uređenje, promet i komunikacije i zaštitu okoline, Vlada Zeničko-dobojskog kantona, na 130. sjednici, održanoj 22.05.2026. godine, d o n o s i

## **O D L U K U**

### **o pokretanju postupka izrade Plana upravljanja otpadom na području Zeničko-dobojskog kantona**

#### **Član 1.**

##### **(Predmet i ciljevi)**

Ovom odlukom pokreće se postupak izrade Plana upravljanja otpadom na području Zeničko-dobojskog kantona (u daljem tekstu: Plan), sa ciljem:

- a) Uspostave održivog integralnog sistema upravljanja otpadom na području kantona, koji se treba bazirati na načelima održivog razvoja i to na principima izbjegavanja, vrednovanja (materijalno i energetska) i odstranjivanja otpada;
- b) Uspostave integralnog sistema upravljanja otpadom na području kantona, u smislu obezbjeđenja i uspostave mehanizama za: minimalno nastajanje otpada, posebno svođenje opasnih karakteristika takvog otpada na minimum; smanjenje nastalog otpada po količini, posebno uzimajući u obzir optičaj otpada; tretiranje otpada na način kojim se osigurava povrat sirovine iz njega; "Sigurno" odlaganje samo onog preostalog otpada čiji je utjecaj na okoliš minimalan;
- c) Zaštita okoliša i promocija i poticanje održivog korištenja resursa kroz uspostavu integriranog sistema upravljanja otpadom;
- d) Smanjenje rizika po okoliš i zdravlje ljudi i uspostava prioritetne infrastrukture za integrirano upravljanje otpadom;
- e) Smanjenje količina otpada za finalno odlaganje/zbrinjavanje uz efikasnije korištenje resursa;
- f) Osiguranje provedbe sistema kroz pravni, institucionalni i ekonomski okvir;
- g) Osiguranje sistematskog praćenje parametara za ocjenu stanja okoliša;
- h) Izbjegavanja, sprečavanja ili smanjenja štetnih posljedica po ljudsko zdravlje, kvalitet života i okoliš u cjelini;
- i) Izvršavanja obaveza BiH preuzetih međunarodnim ugovorima i sporazumima;
- j) Osiguravanja učešća javnosti u rješavanju okolišnih problema, te poboljšanja transparentnosti i kvaliteta procesa donošenja odluka o okolišu;
- k) Prepoznavanja potrebe i mogućnost regionalnog povezivanja sa ciljem rješavanja zajedničkih okolišnih problema;
- l) Stvaranja osnove za pristup izvorima finansijskih sredstava (EU fondovima, povoljnim kreditnim linijama, privatni kapital, itd.) za buduće rješavanje konkretnih okolišnih problema;

- m) Doprinosa razvoju Zeničko-dobojskog kantona kao „Evropskog regiona“.

## **Član 2.** **(Sadržaj Plana )**

Plan treba da sadrži:

- a) Pravni i institucionalni okvir za izradu Plana;
- b) Indikatore stanja i strateški koncept upravljanja otpadom;
- c) Osnovne ciljeve Plana i povezanost sa drugim planovima i politikama;
- d) Prikaz osnovnih prirodnih i društvenih karakteristika područja Plana, kao npr. geografske topografske i klimatske karakteristike, struktura i broj stanovnika, kao i pregled značajnijih privrednih aktivnosti;
- e) Opis postojećeg stanja upravljanja otpadom u oblasti komunalnog otpada, posebnih kategorija otpada, otpada iz zdravstvenih i veterinarskih ustanova, otpada životinjskog porijekla, industrijskog otpada, opasnog i neopasnog otpada itd.;
- f) Planiranje uspostave i operacionalizacije integralnog sistema upravljanja otpadom na području Ze-do kantona u skladu sa novim konceptom upravljanja otpadom;
- g) Planiranje aktivnosti koje imaju za cilj poboljšanje stanja sektora upravljanja otpadom implementirajući ranije definirane ciljeve. Aktivnosti su bazirane na novom konceptu upravljanja otpadom na području Plana;
- h) Akcioni plan koji kao sastavni dio Plana upravljanja otpadom sa precizno definiranim tehničkim aspektima aktivnosti, vremenskim rokom za njihovo izvršenje kao i odgovornosti za njihovu implementaciju.
- i) Finansijski aspekt plana upravljanja otpadom Zeničko-dobojskog kantona i izvori financiranja.

## **Član 3.** **(Metodologija izrade )**

Plan treba da bude usaglašen sa:

- a) Federalnom strategijom zaštite okoliša;
- b) Federalnim planom upravljanja otpadom;
- c) Strateškim prioritetima jedinica lokalne samouprave u sastavu Zeničko-dobojskog kantona;
- d) Prostornim planom Zeničko-dobojskog kantona;
- e) Strategijom razvoja Zeničko-dobojskog kantona za period 2021. – 2027.godina.

## **Član 4.** **(Obezbjeđenje sredstava)**

Sredstva potrebna za izradu Plana obezbjeđena su iz Budžeta Zeničko-dobojskog kantona i to iz namjenskih sredstava Fonda za zaštitu okoline u skladu sa Programom utroška namjenskih sredstava Centra za okoliš Instituta „Kemal Kapetanović“, Univerziteta u Zenici, broj: 01-03-10-599/26 od 04.03.2026. godine.

**Član 5.**  
**(Rok izrade)**

Rok izrade Plana je utvrđen rokom izrade konačnog prijedloga Plana upravljanja otpadom Federacije BiH i rokom izrade Strateške procjene utjecaja na okoliš Plana, a sve u skladu sa Uredbom o strateškoj procjeni uticaja strategije, plana ili programa na okoliš i obimu, sadržaju i ocjeni strateške studije („Službene novine FBiH“, broj: 12/25).

**Član 6.**  
**(Nosilac pripreme i nosilac izrade)**

- (1) Nosilac pripreme Plana je Vlada Zeničko-dobojskog kantona, putem Ministarstva za prostorno uređenje, promet i komunikacije i zaštitu okoline, a nosilac izrade je Univerzitet u Zenici, Institut „Kemal Kapetanović“ Zenica.
- (2) Nosilac pripreme će nosiocu izrade Plana osigurati potrebne podloge i dokumentaciju rađenu na teritoriji kantona, a nosilac izrade je dužan za izradu Plana koristiti važeće dokumente.

**Član 7.**  
**(Radni tim za izradu Plana i nosilac izrade Strateške studije)**

- (1) Nosilac izrade Plana će u saradnji sa nosiocem pripreme imenovati radni tim za izradu Plana, koji će biti nosilac izrade.
- (2) Nosilac izrade Plana u saradnji sa nosiocem pripreme Plana će donijeti odluku o izboru nosioca izrade Strateške studije po postupku utvrđenom Zakonom o javnim nabavkama, a sve u skladu sa Zakonom o povjeravanju javnih ovlaštenja iz oblasti zaštite okoliša („Službene novine Zeničko-dobojskog kantona“, broj: 12/13) i Uredbom o strateškoj procjeni uticaja strategije, plana ili programa na okoliš i obimu, sadržaju i ocjeni strateške studije („Službene novine FBiH“, broj: 12/25).

**Član 8.**  
**(Stupanje na snagu)**

Odluka stupa na snagu danom donošenja, a bit će objavljena u „Službenim novinama Zeničko-dobojskog kantona“.

Broj: 02-19-10465/26  
Datum, 22.05.2026. godine  
Zenica

**PREMIJER**  
**po ovlaštenju**

*Dženana Čišija*

DOSTAVLJENO:

- 1x Ministarstvo za prostorno uređenje, promet i komunikacije i zaštitu okoline,
- 1x JU Univerzitet u Zenici - Institut „Kemal Kapetanović“,  
putem Ministarstva,
- 1x „Službene novine Zeničko-dobojskog kantona“,
- 1x a/a.